

# OMUKWETU



OSHIKO SHIKA OSHO OSHIHOELWA SHOLUPE LWA DHILADHILWA OMUKWETU 1969

OKOTOBA 1968

No 19

## OSHI NA UUTUMBI WASHIKE

Pethimbo ndika omuntu a fa ta tala kuty, kape na mbudhi unene shampa tali piti lyo tali yimo osha gwana nando ke na iilonga yasha niinakugwanithwa yesiku kehe. Shika otashi holoka unene ngele to ende pomahala ngoka haga gongala oyendji, nena oto adha naanaa omugundjuka nenge omukuluntu gwanasho a ninga ombwiti yomelundu. Ke na sho ha longo ye ke na wo sho ha gwini muumbwiti we mbo. Mpaka itatu dhiladhila mbo-ka taa ngeshefa, aawe, ongoye tuu.

Aakwetu ne Aawambokavango, oshigwana otashi mono tuu uutumbi washa ngele itashi dhiginine iilonga nokwihepeka omolwasho nomolwomaluvalo gasho gongashingezi nogokomeho? Mokweedagula koombinga noombinga pwaa na elalakan-nyasha, otashi holola tuu nokusimanekitha omwenyo gwoshigwana? -Aawe-ndishi. Shila otashi thindile owala omwenyo noonkondo dhosshigwana meshunduko.

Ngashingezi omadhiladhilo gokupewa eipangelo lyoshigwana sho taga inyenge mombepo yehumokomeho, oshinakugwanithwa shoye monkatu ndjono oshini? Uuwawalali, uunkolwe, uufuthi, uumbudhi nokwaainekelathana, uumbwiti womehenene itaau gwini sha nowaa na elalakan-nyasha? Ayihe mbyoka oyo eishundulo lyoye nolyoshigwana shoye wo, onkene yi thi-gapo ino ya nayo mehumokomeho.

Shoka tashi tungu osho okukala omudhiginini miilonga, muukriste meitaalo nokukala pantu. Etha ano omadhiladhilo agehe omiinayi taga fulukitha omutima gwoye ogomadhipago nuutondwe okutonda omukweni a shitwa ondjelo yaKalunga nokwa kulilithwa ombinzi yOmwan-a omuholike.

## SWAZILAND MUV.V.O.

Swaziland, edu olo opo la mono elipangelo paife ole lishangifa mou-shilyo moV.V.O. Kumwe nomadui-lyo muV.V.O. Swaziland ola ninga oshilyo oshiti 125. Samuel Sukati, omukalelipo waSwaziland muAmerika, oye a yandja eindilo loushilyo la nyolwa kuhamushanga waV.V.O omushamane U Thant.

## EENHOKOLWA DEPANGELONGERKI

<sup>1</sup> Efaneko omudiakoni Maria Kaveto a kale omatrone moSekundofikola poRuntu omolu ovalongwa vongerki yetu la kolekwa kEpangelongerki.

<sup>2</sup> Epangelongerki la tokola ovalongwafita Absalom Hasheela a ye ketwiki-lofikola kuMapumulo naHeikki Uushona kuTurfloop, Tvl.

<sup>3</sup> Epangelongerki la tambula nepandulo eindilo lomulungi Eunike Shanghai, Ombalantu okulonga oshilonga shoulungi metumo kOmindamba 1969.

<sup>4</sup> Epangelongerki la lesya nepandulo ombilive yovanashilongatumo ya dja moshoongaleje shavo mEngela omolu omaudjuu momapyatumo. Epangelongerki tali kumaida ovakriste va diinine oukriste wavo hakulifukika vali pasipaani.

<sup>5</sup> Epangelongerki tali indile ovafitaongalo novalidiliki va kendambale okuyelila ovakriste ouwa noukoshoki welidiliko loikolwifa. Notali dimbulukifa kuty, okukondjifa oukolwe noikunwa osho oshilonga shongerki aishe noshomukriste keshe mokukondjela oukriste nouwa woshiwana.

<sup>6</sup> Epito mekonakono lelaka lovatumwa tava landula la kundanwa nepandulo kEpangelongerki: mOshikwanyama: Maija-Liisa Niinimäki naViivi Wilde. MoRukwangali: Raili Toivanen naLea Kolehmainen.

## ONTANDA YUUKADHONAGONGALO MONDONGA

Uukadhonagongalo womomagongalo omulongo gomOndonga owa li wa thiki kOnguma komatango gesiku eti- 9 lyAuguste 1968.

Potundi ont-9. otwa gongala montandangerki yetu notwa kundwa komudiakoni Aili Abisalom noohapu dhi li mEpsalmi 144:12. Omusitagon-galo gwaagundjuka tate T.Ngula nomweevangeliste gwaagundjuka tate A. Kalumbu e tu kundu wo. Konima twa leshelwa omauthompango gomontanda.

Metata lyohetatu esiku lya landula twa yi kokapale. Hwiyaka twa ningithwa omainyengo gi ili nogi ili komulongi Hilma Nyamu naMagdalena Mateus.

Konima yowandaha twa tsikile nomathigathano gokwiimba komuntu gumwe awike nokulesha. Omolwa uuwindji waanona otwa hokololitha nokwiimbitha aanonaa yaali ayeke megongalo kehe. Egongalo lyokOntananga olyo lya li lya talika esindani moka mwa li umunona ngoka imbi nawa e vule yakwawo ayehe.

Pomutenya twa tsikile nomathigathano ngaka okunuka uule womundjomboko, okudhenga etanga nokumatuka. Miinima ayihe mbika ka-kele okudhenga etanga, umunona kehe okwa li a mono ompito. Mokudhenga etanga aadhani yokOntananga oya li ya sindana. Mokunuka omundjomboko egongalo lyaNiipa

olya sindana. Mokumatuka aanonaa yaali Aashigambo oya sindi omagongalo agehe sho ya li ya matuka oo-seconde 90 adhike.

Ongulohi otwa li twa hungile nokupulakena ookuoro nomahokololo. Mpaka ka twa li twa tala aasindani ihe otwa hungile ashike pamwe nokunyanyukwa.

Ongula onene yesiku lya landula, Osondaha, twa ningilwa otundimbimbeli kutate M. Ngipandulwa Enedhiladhilo lye lya li:- Kehe gu-mwe umunene nenge omushona oye ota vulu okulongithwa kuKalunga. A gandja oshiholelwa shaSamuel Sam. 3. Nando a li okamati a pewa nokuli oohapu oonkunkutu e dhi faalele omusaseri Eli, Sam.3:11-14,18-19.

Potundi 10, twa hiti melongekolalunga lya ningwa kutate Ngula. Pehulilo lyelongelokalalunga pwa gandjwa omapandulo kaayakuli yetu naasindani ya pewa ondjambi.

Kaafilippi 3:14 Paulus ota ti: "O-tandi matukile kethikilo okondjambi yesindano." Aanona oya li ya matukile kondjambi yesindano lyomuu-yuni mbuka ihe momayimbilo ye ga imbi nomomahokololo ye ga hokolola ya fa yu ulike wo kuty, otaa matukile kondjambi yesindano taye ke yi pewa megulu.

Frieda J.N.Niinkoti  
naHilma Nyamu

# OMWENE OTE UYA, OPENI TO HANGWA?

Luk.12:42-48.

Otekisti ei oi nepulo tali yuktile kwaame nokwoove, ile kukeshe tu ou a pewa oshilonga kOmwene. Ola pulwa shashi Omwene ote uya.

Olyelye omumati ou a lungama? Omwene waye ta hange eemwenyo da li da puka, ndele oda pukululwa, eemwenyo da vela nde da velulwa? Eemwenyo da kana nde oda koningwa? Noinima aishe meongalo ya longekidwa nawa?

Olyelye omumati ou eumbo laye la pashukilwa nawa, hali leshelwa eendjovo da Kalunga ongula nonguloshi?

Olyelye omumati ou Omwene te mu hange a shakenifa oinakuwanifwa yaye, oiyandjiwa yomudo ya pwa kufutwa, nde ke nongunga yasha keongalo?

Olyelye ou, okukalamwenyo kwaye kwa pashukilwa nawa? E li omwiindili nomuliyandji kuJesus? E li omwiindili nomwiilikaneni woilonga yongerki?

Otwa lesa, omumati a tya, ngaha oye omunelao, osheshi Omwene waye eshi te uya, ote mu pe oukulunhu wafimana woinima yaye aishe.

Ndelene olyelye omumati ou mu shima? Oye tu ou ta hangika kOmwene ina wanifa sha. Ovapuki novaveli keemwenyo nst inava pukululwa noinava hakulwa, ovakani inava kongwa. Eandaha momambu ihadi ningwa vali, eengudumbibeli momikunda oda fya. Eengunga doiyandjiwa yomido eenduba. Ouhasha oo wa ninga omudjalo waye.

Ndele unene oshiponga osha li okunwa nokukolwa. Ehango: 638:3-4.

Omukwetu natu lipule nghe tu li nehalo kOmwene.

Osheshi Omwene okwe tu shiiva fa ehalo laye tu li landule.

Josua Hanjango

## EPUKULULO

Ngele to nyolele kOmkwetu nowa hala ombilive yoye yi yamukulwe, ino nyola edhina lyanima u mu shi ha longo mOshinyanyangidho nenge mOmbelewa yOmukwetu. Kombanda yompunda nyola ko ashike ngeyi: OMUKWETU, ONII-PA, Pk. ONDANGWA, S.W.A. Tu nyoleni wo oondanda dha tonata nawa dhi shi okuleshwa, ee!

# EENGHUNDANA DA DJA KUPAULINUM

MuPaulinum otamu piti ovahongwafita 18 neudo Ovahongwa 9 ovOngerki Onghwaevangeli paLuther mOushimba novahongwa 9 ovOngerki Onghwaevangeli paLuther yomOwambokavango. Ovahongwa ava aveshe ova hovela okunyola omakonakono avo pehovelola Septemba. Eshi va mana omakonakono, opo ne ovahongwa vOngerki yOwambokavango ove uya kOwambo okukonakonwa kEpangelongerki. Epangelongerki ngele va konakona, nole va tala ve shi okukala ovafita, nena tava ka yapulila oshilonga shoufitaongalo eti- 13 Okotoba kOnakayale.

### OVAKAINHU OVAWAMBO TAVE LIHONGO

Odula ei muPaulinum otwa tambula Ovahongwa 18 vase. Movahongwa ava omu na 10 ovo va dja mOngerki yOwambokavango. Movahongwa ovo omu na oukadonalongi vaval; Ovawambo: Wilhelmina Amweelo na Hilma Shilonga, ova hovela okulesha neudo outeologi. Oshinima eshi osho oshikwahistoli. Ehistoli lovakainhu mekwatafano nouteologi mombinga ei yaAfrika yetu la hovela modula ei. Ehalo lavo lokulihonga otali tu pe elinekelo liwa kutya, novakainhu Ovawambo otava dulu nani okulesha-konakona oukalunga. Ohandi pandula eshi Ongerki yetu tai kedabala okuyambula onghatu yovakainhu moiwana yetu.

### POIKOLAINEN TE YA KOWAMBO

Omudosente muPaulinum, omuhongi Urho Poikolainen (Mutyotyo) pamwe neumbo laye, ote ke uya pamwe novalongwafita Ovawambo ava tava piti neudo, opo a hovele vali oshilonga shiwa tashi pumbiwa mOngerki yetu nomoshiwana shetu, okufila oshisho ovapofi, - okudika ofikola yovapofi mOngwediva. Oi-longa yatya ngaha oi shi okufimanekwa shili kufyeni, osheshi otai etele ovapofi omapuniko mahapu. Otava ka kuma edina laJesus nonminwe davo. (-Eshi nda li muSoomi, onde shi kuminwa luhanpoku-tala ovapofi tava shiki okahumba (piano), tava lesa, tava imbi nohava tungile etumo oikuku tai landifwa po noimaliwa tai tumwa metumo. Ndi tye oshilonga shetumo otashi longwa nokovapofi vomu-Soomi. Nokuli ovo tuu va diinina

ediladilo eli, ovapofi vetweni va ongelwe nde va kwafwe nokulungwa). Hano inamu keelelala ovapofi kuKristus.

Omuhongi Urho Poikolainen okwa li ta wapalele oshilonga shokutekulila ongerki yetu ovafita. Oye omufita e na omashiivo mawa kombinga yoshilonga shoufitaongalo. Eshi a li muSoomi, okwa li omufitamuwiliki. A kala yo nale muS.W.A. nokwa shiiva nawa Ovawambo nongerki yetu. -Omaudifo aye luhanpku muPaulinum a kala ngomahungimwenyo kufye, e yadi evangeli.

Efolo Poikolainen a kala omuhongi wovalikadi vovahongwafita muPaulinum. E va honga okudinina omaumbo-okuwapaleka, okukosha, okuteleka noikwashikelele vali. -Oku va kanifa muPaulinum, otwa kanifa shihapu. Kalunga na punike oshilonga shavo shipe, shitunge ongerki yaKristus.

### OIIMATI YOSHILONGATUMO

Natango mongudu ei, omu na omunghwainghwai, omumati Tobias Shiuana. Oye wotete womovanghwainghwai e uya okulesha outeologi (oukalunga). Oye okwa dja mouninginino wOwambo, omo ongerki yetu tai longo oilonga yeudifo 1Evangeli, mokati kovapaani. Nani oshilonga shetumo shongerki yetu, kashi fi ongaho mOmwene. Oshilonga sha eta oimati. Oshimati shime, Tobias oyoo e li oku kofikola ei yakula muS.W.A. Tu mu indilieni, opo a pewe eenghono dOmhupo Iyapuki ndele a ka kale ouyelele waKristus nomoiwana inya yovapaani.

### TAVA KA MONA B.A.

Otu na natango ovahongwa va pita nale omatrika, Ovawambo vali: Matti Amadhila na Elia Nii-nkoti, tave lihongele onghatu B.A. meenhumwafo mekwatafano nofikola yokombada yaPretoria. Ohava kwafelwa yo meewino keedosente daPaulinum. Hatu lineekale kutya, Matti Amadhila ta ka hanga odi-mbu yaye modula tai uya nokumona onghatu yaye.

Onye ovakwaita ovaholike va Kristus, ngenge mwa uda ndumbi eshi tu li po, ladipaleni moku tu ilikanena. Ohatu kala tu nomukumo nge hatu longo yo tu li mondobe yomailikaneno eni.

*Eenghundana edi oda ongela ku  
Abisai Shejavali*

Omukwetu gwomvula tayi ya otaka kala e na omalunduluko gamwe ngaashi omatseyitho taga landula mpa:

a) Epandja lyotango mOmukwetu otali ka longithwa ongepeko tali siikile oontumba dhoka dhi li meni lyoshifo shoshene. Mepandja olyo tuu ndyoka otamu ka kala aluhe efano li li moombapa mbali, onkee oshifo shika osho oshiholelwa shoka tashi ulike naanaa olupe moka Omukwetu e na oku kala ta holoka okutameka Januali 1969.

b) Omolwomaopaleko ngoka, o-kwa dhiladhilwa wo kutya, onando yOmukwetu momumvo tagu ya yi gwedhelwe noosende 10, ano mOwambo Omukwetu gwomumvo tagu ya ta landwa 70c kUushimba nOkavango 90c palwe R1.30c.

c) Ngashingezi ombelewa yopoosa sho ya huma komeho mokuthikitha opoosa kooyene yadho, otatu ku tsu omayele omuleshi nomumbesteli gwoshifo omusimanekwa, u dhiladhile wo ompito ndjoka yokulongitha ombelewa yopoosa; ano opo oshifo shoye shi thike kuyele kungoye, onawa ngele tashi kala hashi endeles mombelewa yopoosa.

Ngoka a hala shi endeles kombelewa yopoosa oku na okufuta 90c omolwostombe.

b) Omuleshi omusimanekwa, tatu ku dhimbulutha ishewe u inyolithe manga kuyele. Ino tegelela ethimbo sho lya pwa po ngoye opo nduno u kuthe Ndimba moombwa; oto a dha a lika po. Tuma ano edhina lyoye pamwe noosende 70 nenge 90 omolwOmukwetu gwomvula tayi ya.

e) Omukwetu oye oshifo shomukriste kehe gwOngerki onkwaevangelii paLuther yOwambokavango moka ngoye wo u li oshilyo. Onenne omukriste kehe ota tegelela a kale ha leshe oshifo. Osho wo omukriste kehe oku na uuthemba okunyola sha mOmukwetu. Olwindji aantu yamwe oya fa haa dhiladhila kutya, oshifo shika oshasita, aalongi, aayevangeliste, aapangi, aakuluntugongalo nayalwe ya fa mboka. Aawe, oshifo oshoye wo ngoye ngoka waaheli mongundu yontumba ya tumbulwa mpaka. Ou na naanaa epitikilo ndyoka okutama iinyolwa yoye kOmukwetu.

Mokupopya iinyolwa tayi futilwa itashi ti oshinyolwa kehe tashi tulwa mOmukwetu otashi futilwa, aawe. Omauvitho, oonkundana, omapukululathanolongo, omapandulo, omahambelelo, nosho tuu iikwawo ya fa mbyoka, oyo kayi na okufutilwa.

Mbyoka tayi futilwa ongaashi omaigidho giinima ya kana nenge ya too-lwa, omahalitho giinima, omatseyitho goongeshefa nenge etseyitho omolwo-shinima shontumba shomuntu mwene. Iinyolwa mbyoka ho mono mOmukwetu yi li mokalugumbo oyo hayi futilwa. Moshifo shika oto mono yi-mwe kepandja eti-5 neti-6 mbyoka tayi futilwa.

Ohaku yelekwa, moondeimi, uunene wehala ndyoka oshinyolwa sha kutha mepandja, ano ngele osha kutha uunene wehala lyondeimi yimwe nena mwene gwoshinyolwa oku na okufuta R1.00. Ngele oondeimi mbali 1.70c nosho tuu. Oondando dhi nokufutwa omolwiinyolwa, otadhi monika aluhe kepandja lyahugunina mokalugumbo ke na oshipalanyolo **OMUKWETU**. Mpoka oto mono wo ondando yoshifo mOwambo, kOkavango nUushimba nosho tuu kombanda yomafuta (oorsee).

Efatululo ngandika olya li nale moshifo No.3 yomumvo 1967 kepandja 5 ngele oho dhiginine iifo yoye, oto vulu okutalamo ishewe.

## KAANUUMBO WOPPOOSA AMUHE

**Otandi mu tseyithile one aapunguli yiimaliwa moopoosa amuhe kutya; aluhe dhimbulukweni okutuma uumbo weni koopoosa dhaandjeni, opo opoosa yi u tume kombelewa onene yuumbo wopoosa kOvenduka.**

Ano aluhe ndhindhilika omwedhi mu wa li wa toto okambo koye, opo u ka tume wo momwedhi tuu ngoka. Tutyee nee, ngele owe ka toto muJanuali nuumvo; nena dhimbulukwa kutya, muJanuali omumvo tagu ya oto tegelela u ka fale koopoosa, opo ka ka tumwe kOvenduka. Tashi ti momwedhi gwevalo lyokambo koye, otaka pumbiwa aluhe ka kale ka thika mombelewa onene, opo wo ka ka pewe omagano gevallowyako pauwanawa wako. Ngiika to pula nokuli kutya, uuwanawa ouni?

Ndhindhilika nawa kutya, aluhe ngele omunona ta ningilwa evalo lye, oha pewa omagano pakudhiginina kwe ilonga nopakuvulika wo megumbo. Okambo koye wo ota ka talwa naanaa ngaashi omunona ta dhimbulukilwa evalosiku lye. Ngele oka dhigginina yiimaliwa oyindji negwedhelo wo ota li ka kala olindji. Ngele omu na omake omafupi, nena nomagano (egwedhelo) ota ga kala oma-shona.

Ano shoshene elalakano olyo ndyoka kutya, ombelewa yi mone noyi tseye uumbo auhe mboka tau longo inaa dhipagwa po. Onawa wo sho komeho tatu ka fatululilwa wo noopelesenda dhomagwedhelo nawa mOshiwambo tu uve ko nawa atuhetuehe mokupungula yiimaliwa kwetu. Tamaka ano okundhindhilika shoka we

shi leshe nokushi longitha wo patseyithilo ndika lyotango lyoshinima shika, melaka lyoye mwene. *Okupungula mopoosa okwo omukalo omwaana-wa unenenene!* J.Jacky Amkongo Oranjemund

## TWA TALELEPO KETUNDA NOMINDAMBA

Halwotango nduka sho twa talele po omapya getumo Etunda nOmindamba. Omumvo gwa yi otwa li twa talelepo ishewe omapya ngoka. Tango otwa yi mEtunda. Mpeyaka otwa kundwa nombili komusamane Samuel Mateus. Konima yekundo, otwa topoka muungundu notwa yi momikunda okutalela po aamwame-me. Oye tu taamba nehalo ewana-wa. Osha li enyanyu kutse okumona aantu oyendji ya li ya gongala mohungi.

Twa thiki pOmindamba notwa pitula po omulongi S. Gueendama twa yi nooye kontaululi kookamba dhoka dhi li ko odhindjindhindji nopwa gongala oyendji yomAadhiba nAandongona.

Mokweenda nkwiya, otwa dhimbulula kutya ehalo omo li li maamwame-me, ihe otaa pulakene okathimbo nohokwe onene. Shaa tuu aatalelipa ya shuna, nena olwindji ohaa shuna miinima yawo iikulu. Oshali enyanyu enene wo kutse sho twa mono kutya, mEtunda nOmindamba aanona oya indjipala mooskola. Tu ya faleni koshipala shomusilishimpwiyu mokgalikana, opo ya mone aalongi taa pumbiwa. Andola u mone ompito okuthika mwene komapya getumo ngeyee!

Miina N. Shongolo

## NATSE WO ONGAYAKWETU

Otwa kala ethimbo ele tatu gongalele pamwe moskola yetu yetitatu, mongerki mOnaanda. Momimvo ndhika aagundjukagongalo yandjetu ya indjipala yesi okutopoka ya ninge omatitatu paali. Petameko lyomumvo muJanuali, aagundjukagongalo yomukunda gwaShakati-wes, oya pula ya pewe oshigongi shawo momukunda gwawo. Osha pulakenwa wo, e taa lombwelwa ya tegelele uule woomwedhi dhimwe nokukonga omuwiliki.

Aagundjukagongalo, Aashakati-wes ya lalekwa ya ka tote etitatu etiali momukunda gwaandjavo. Esiku etihetatu lyaSeptemba nuumvo, mongerki yomOnaanda omwa ningwa oshituthi shetsakaneno lyaagundjukagongalo. Mpaka otatu ya mono mefano pamwe nepandela lyawo.



*Aagundjuka yomOnaanda metsakanenoshituthi shawo*

Oye li pongerki yaandjavo ya taalela oshinyangagongalo. Petameko lyoshituthi omwevangeliste Gabriel Ipinge a popitha aagundjukagongalo noohapu dhaKalunga mEpsalmi 119: 9. Omugundjuka oto opaleke ondjila ye ngele ta kongo ekwathanano naJesus. Nomugundjuka tu utha okukala kwe kuJesus:

Esiku ndika olya li enene kutse, oshoka omo tse aagundjukagongalo twa ningi tango etsakaneno lyomai-mbilo nomahokololo. Etsakaneno lyotango wo mokuumba ongalo; Ayihe, otseni aagundjuka natu yi ningeni pamwe naJesus. Jesus gwe-tu na kale omutetekeli komeho oku tu ukitha metumo.

Pehulilo tate Johannes Shifiona a tumbula paPsalmi 110:3 b aagundjuka yoye otaye ku aandukile ongashika omume mekolo lyeluwa.

*Titus Uusiku*

## OSKOLA YAAVALITHI MONANDJOKWE

Otayi taamba aalongwa aape esiku lyotango lyaFebulali 1969.

Mboka taa vulu okutaambelwa mo oyo:

Aakadhona ya pita "Junior Sertifikaat" nenge St.X.

Aayakulipangi ya pita ekonakono lya "S.A.Verpleegsters-raad."

Aalongikadhona.

Mboka taa ka nyola omakonakono ga tumbulwa mpaka numvo naye tu tseyithile ngaa ehalo lyawo nokuli manga omayamukulo gomakonakono ngoka ya nyola inaage ya.

**Ayehe mboka ya hala okutameka oskola naa tume eindilo lyawo kOmukeluntu gwoskola manga esiku eti-10 lya-Novemba 1968 inaali thika.**

Ngele to ithanwa ila noomba-pila tadhi tumbulwa mpaka:

- 1.Onzapo yegongalo.
- 2.Onzapo yahugunina yoskola.
- 3.Epopilo lyomukuluntu gwonasarea nenge oskola moka wa li.
- 4.Onzapo yuukolele.

"Kalunga okwa monitha elago aaavalithi, aantu noya kolelela."

(2Mos.1:20.)  
*Omukutuntu gwoskola  
Onandjokwe*

## OMUSHE KOMUKRISTE

*Immanuel Ng.Kamati, Roodepoort, ota nyola nghaha:* Ohatu ti, nima okwa umbilange omushe ndele nighi shii eshi tau ti. Hano nafye yo ovakriste otwa umbilwa omushe tau ti:

"Ou te linyateke ne linyateke, ndele nee ou teliyapula neliyapule natango. Ndele tala ame ohandi uya diva okupa keshe tuu umwe eshi elilongela." Ehol.22:11,12.

Hano oove omuteleli wondjambi mukwetu, omunyasha nomukulunhu, otwa teeleta ondjambi ilipipo? Oyo tuu ei yomwenyo waalushe ile ekanlongaho! Tu indileni Omwene e tupe Omhepo Iyapuki i tu longe okuuda ko omushe ou wa umbilwa omukriste mOmbibeli.

## ONKUNDANA YOMOSHI-GONGI SHAAGUNDJUKA YONDONGA

*Etameko lyehokololo lyoshigongi shaagundjuka mOndonga olya holoka nale mOmukwetu gonumeli' 17, onkene mpaka tapu landula etsikilo lyalyo natango.*

Omumbisofi L. Auala, okwa talele po wo oshigongi shaagundjuka. okwe ya popitha nomatumbulo nga:

"Egumbo olyo omidhi dhehumokomeho. Ngaashi nda tala koombinga dhOwambo yetu, onda dhimbula oshiponga. Osho aagundjuka mboka ya piti Std. VI inaya hala momagumbo gawo moka ya kala mo shito naakuluntu ya thigilwa oluhepo megumbo. Otwa tseyea, omidhi ngele dha tsikwa mombepo, otadhi sile mo. Tu dhiladhileni omasiku ngoka ge li komeho getu. Kalunga okwe tu egululile ehumokomeho tu li longithe nawa. Ihe ome-ho kage nomakamba gokweenda nagaashi omagulu onkee kehe oshilyo nashi dhiginine iilonga yasho. Omidhi dhehumokomeho odhi li muKalunga. Ngele Kalunga okwe ku shita Omwandi, ihe omidhi dhyo ye to dhi tula muye, oto ka ima oonyandi. Ehumokomeho lyaa nomidhi muKalunga olyo oshiponga."

Aagundjuka yOndonga oya kondjo shili mokugongelela oshiketha shawo iimaliwa, ye yi kongo pamukalo gwontumba nenge gongandi. Ethigathano miigongelwa lya ningwa moshigongi shawo pamagongalo, otali landula mpaka:

1. Oshigambo	R 81.00
2. Oshtayi	R 79.00
3. Onandjokwe	R 67.00
4. Okaku	R 61.60
5. Eheke	R 61.10
6. Oniipa	R 55.70
7. Olukonda	R 32.40
8. Oshaango	R 23.00
9. Onayena	R 15.00
10. Onyaanya	R 15.00
11. Omuntele	R 14.00
12. Ontananga	R 13.00
13. Okankolo	R 3.10

Konima omutanatelishitayingerki T. Shipanga, sho a tumbula oma-pandulo ge, tatekulu David Shihepo, okwa hulitha oshigongi nelaleko nuuyamba notwa halakana.

*Oohamushanga: Lusa Shipena naKristina Kamukoto*

**Dhimbulukwa wo Omushiti gwoye opomasiku guugundjuka woye, manga omasiku omuinayi inaaga thikana po nomimvo tadi hedha ko, ondhoka to dhi popi e to ti: odho i-nadhi opalela ndje**

**Omuuv.12:1.**

## KONGOLO KWA SHA

Valumenhu vaNekanda, vakongi vongobe yaHauvinga, oshiima oshe li fika nee. Onhembu mafiku otai tembula Hai ti: momitwe omu na sha tuu? Ile otamu imbi ashike: "Novemba ila u tu mangulule?" Inamu lwa ondede.

Mulumenhu, toola omambo, opo fiku to i mo mekonakono omo, owa dililwa. Nena oto limemesha ashike; nekonakono loovene oshivilo shehafo. Nge kamu na sha oto ke li tala ongengungule nomushitelio mwene nokuli, shaashi vati oha pula oyo inai wana okupulwa. Omunyasha, kondjela oshiwana shoye; omolwashed u li momahongo. Kufa Ndiba meembwa. Owa fa tuu oikuti yokomhindo? Tala, ovanyasha ongulungu nanghwaka da hailudu oshingali, fye twa lya ko shetu.

Tameka hano eendululo pashinyo-lwa shaN. Hamata mOmukwetu No. 14. Ashike mu(b) ohandi weda mo: 1. Inda p on h e l e yelimweneneno 2. Tula omadiladilo oye aeshe moshilongwa. 3. Lesha nde kala u udite ko.

4. Onawa nge to lesa kombinga yoshinima shonhumba u leshe ko shihapu pefimbo limwe opo to udu ko nawa. 5. Diladila nee ngenge oto dimbulukwa. Ngenge ito dimbulukwa po shihapu, leshulula natango. Eshi otashi ku kwafa uha dimbw. Eudeko a like lihe li pamwe nokutula momadimbuluko itashi kwafa sha. Ino ty a paife we shi shiiva sha pwa, aye. Pefimbo longalo, ile wa londa ombashikela, ile u na eemhele to ka tala omeva ile peni hano, diladila oshinima eshi wa leshele.

Amushe ovo tamu ka nyola omakonakono ohandi mu halele eenghono nepuniko. Ondi na elineekelo otamu ka longa sha shomupondo.

L. Hamunjela

## ETALELOPO MUGOBABIS

Esiku eti-7.9. 68, otse otwa talelwapo kaayenda omuyevangeliste gwongerki ayihe omusamane E. Angula yo nomusita gwaagundjuka mehalakano G. Max.

Mohungi yokokomboni omuyevangeliste S.E. Amutenja okwa tamekitha ohungi negalikano sho pwa imbwa tango 435 nokwa leshwa Ps.107: 1-9. Okwa pandula Kalunga sho e ya dhimbulukwa moluhupo lwawo moku ya tumina aayenda nokwa ti: "Tangi unene sho mwe ya po, otatu mu taamba nenyanyu. Otatu egulula oomwenyo dhetu, opo mu

tu pe muuyenda woohapu dhe mu etitha huka."

Gerson Max okwe tu thikithile omakundo ga zi komusamane P. Laukanen koSoomi. Okwa pandula ishewe Kalunga sho eenditha oshilyo shongerki ayihe yOwambokavango sigo sha thiki nokuGobabis wo. A tsikile oku tu popithitha noohapu: "Ethimbo lyo opala, ongashingezi, tala esiku lyehuputho onena hangula. Ino li kandulapo ngoye ino li hunutha." 2Kor.6:2.

E. Angula okwa lesa Mat.14:30 nokwa fatula nkene oyendji taa ende mefuta lyuyuni mbuka yo itaaya igidha Jesus e ya hupithe, nonando oye okwi ilongekidha oku ya hupitha. Oyo ya mangwa komulungu. Okwe tu hiya tu ye kuJesus tu hupithwe.

Okwe tu ulukile omafano nomolupe tuu ndoka okwa thikitha omakundo gongerki ayihe yOwambokavango kutse.

Eti-8.9. aayenda ya talele po egongalo lyaombaatili. Nkwiyaka oya hokolola oshilongatumo tashi longwa kongerki yaELOK. Megongalo lyAawambo moka ya talele po komatango gesiku tuu ndyono, omwa li mu na iituthi yopane eshasho, ekoleko, ekuthilo nUulalelo Uuyapuki. Kongulohi aayenda oya ningile ohungi mokati kaalongwapangi. Mesiku lya landula sho ya li ya ningile aamati yondoolopa kumwe naalongwapangi ohungi, tate Angula okwa tumbula: "Otse aantu naamwayinathana muKristus. Pamwe opu na ngoka ti iteka Kalunga omunamwenyo? Uuvu weiteko owa geaya nopethimbo lyetu. Ila kuJesus u aludhwe. Aneka omwenyo gwoye koshipala she, opo e ku aludhe." Konima yeuvitho aalongwapangi ya ulukilwa omafano gaapangi Aawambo nkene ye li miilonga taa yakula oshigwana shawo sho yi igandja tango yoyene kuKristus.

Omusamane Angula pamwe na Max oya talele po omahala agehe konyala noya thikithilemo etumwala lyaJesus.

Omagongalo lyAawambo, Aahereo nolyAanama oga li ga gongala pamwe muKatutura moskola yaanonan. Omuhongi M.Krichof okwa pandula Kalunga sho a tumu aayenda nokuGobabis wo nokwa hambelele omolwawo. Natango Angula a gandja omakundo gongerki ayihe yaELOK mokatalitha omafano taga hokolola oshilonga shevangelishe tali vangelithwa maantu koombinga noombinga. Ev.S.E. Amutenja

## SERETSE KHAMA MOSHI-HAKULILO



Seretse Kama

Omushamane Seretse Kama, opreshidende yaBotswana, okwa kwa-twa koudu mafiku a djako nde a twalwa moshihakulilo muJohannesburg neulumo. Okwa popiwa mee-radio nomoifo kutya, oudu wa twa-life opreshidende Khama moshihakulilo oo exuli lihe li nawa.

Omuponhele waye Dr. Quett Ma-sire, okwa tumbula euditonghenda a tya: "Ofye otu udite olukeno no-malipulo manene omolwomupreshi-dende wetu Khama eshi ta vele nghaho." Paife otaku popiwa kutya, okukala kwaye mombete youyahame otaku ti po ngaho hwepo efimbo nefimbo.

## OLUKANDA LIKULU LAVENDUKA

Omuponhele wepangelo laSuidwes okwa shiivifa kutya, olukanda likulu laVenduka ola tembulwa po papangelo novanhu vamo vahapu ova tembukila kolukanda lipe Ka-tutura.

Nonande vahapu va tembukila kuKatutura, natango ovanhu vamwe ova fyaala molukanda likulu. Epan-gelo ola tokola kutya, otali ka han-dukila aveshe ovo va fyaalamo, ovo va dile kOwambo odalate ya-vo otai teywa novatilyane ovo tava tambula moilonga ovakalimo otava handukilwa. Ovo inava hala okuya kuKatutura, otava dulu okuya komadu avo.

## OSHIHAUTO TASHI LANDITHWA

Prince Super Miler  
Omodela 1966  
She enda oomaila 10,000  
notashi kotha R500.00  
Ngoka e shi hala ne ye  
kOshinyanyangidho kOniipa.

# OUNYUNI OTAU TONGO SHIKE

## MOWAMBO OMU NOMAHOOLI

Ope neinekelo lyakolalela kutya mOwambo omwa fa mu nomahooli. Osho wo sha monika mOta vi. Omamanya ga fulwa nomOwambo, anuwa oga fa naanaa omamanya gomiilongo yilwe ngoka haga kala pokuma pu na omahooli.

## ONGUNDU YOKUKONAKONA

Opa totwa nale nokuli ongudu tai konakona oshiponga shodila 707, die Pretoria, oyo ya dipaele oindele ihapu popepi nokapale keedila mOvenduka. Ongudu otai konakona nawa nokupulapula nawa nghe oshiponga sha enda.

## VAMWE OTAVA PANGULWA

Eshi odila 707, die Pretoria ya mbolokotelele pedu mOvenduka nde ya lya ovanhu vahapu, oinima yaovo va li modila, eeradio, eendjato, omafano, oimaliwa oambale, oidjalomwa, eembapila di noshilonga, eevili noinima ihapu, oya li ya halakanena apeshe. Ovapolifi ova kala va kelela paha vake sha. Ovamenhu vamwe ovatilyane osho va vake po oinima imwe nde ova kwatwa notava pangulwa paife.

## OMUSHAMANE SALAZAR

**LISSABON.**— Dr. Antonio Salazar, oministeli yotete yaPortugala, okwa kundanwa e li nawa eshi a tandwa momutwe. Omushamane Salazar oku needula 79 moukulunhu.

## ONGOPOLLO TAYI KONGWA

**UHLENHORST.**— Ope niilonga yokukonga ongopollo pofaalama Sib nokwa kundanwa iilonga otayi humu nawa komeho. Aatiigane yahetatu naaludhe oyendji oyi ipyakidhila noshilonga shoka shokutala ngele mevi omu nongopollo

## A LUMATWA KONGAMELO

**AROAB**—Omutiligane gumwe, gwe-dhina Andries Blaaw pofaalama Schanskolk, ando gwa nanwa mo kongamelo. Omusamane Blaaw okwa li ta kwatha mushiinda she okutsilika ngamelo moshiauto e mu landa kuye. Ano okwa ningi manga ta siisilita omunya kohi yepunda lya-tilambuga, ye oku mu na omayego kokutsi, hanga a ya nakwo. Okwa ningwa iilalo inene noye mu falitha moshipangelo moka okutsi kwa hondjelwa ko niilalo ya a ndekwa. Omusamane Blaaw okwa li a haluka unene aniwa.

## ETWIKO LOMUTIMA ETITATU



*Omushamane Peter Smith ou a tulwa omutima mupe mafiku a djako*

**Kaapstad - Moshihakulilo die Groote Schuur, Kaapstad, omuprofesori Chris Barnard pamwe noshipana yaye ova twika vali omutima momushamane Peter Smith, 52, omulongima wokuJohannesburg, pomafiku a djako.**

Meeradio nomoifo mwa shivifwa oshinima eshi nokwa tumbulwa yo kutya, omushamane Peter Smith ota xumu nawa komesho moukolele. Oshilonga eshi osho osshitatu okuningwa muSuid-Afrika.

Omushamane Blaiberg, ou omutivali waavo va twikwa omitima mu-Suid-Afrika, oku li natango moshihakulilo omo nokwa popiwa kaku shiivike onaini tai keumbo.



*Omumati nguka oti idheula okupinyuka oshitenda shoka shi li koongudhi. Mboka yi idheulalela ohaa vulu okuninga iikumitha.*

## OIPONGA YA PULA EEMWE-NYO DIJAPU

Okwa popiwa kutya, mefimbo lixupi lonawee, ovanhu 161 ova fya moiponga yomeendjila, momashina moihauso, nomambesha a mbolokotela pedu ile a wila moilambo novanhu va fya pokafimbo opo.

**India**—Ovanhu vefike 82 a veshe kumwe va fya muIndia. Okangudu kovanhu 52 kovaimbi ka hangwa taka ende membasha, a veshe ova fya eshi embesha la kulumukila mekantha lilelile. Embesha likwao la li novanhu 28, ola wa komutuni weefute 500 naaveshe ofilu.

**Indonesia**—Ovanhu 30 ova fya navamwe 150 ova ehamekwa eshi oma-shina okolutenda e lindenga mumwe muDjakarta.

**England**—Edila limwe laFrankryk muEngland, hali tukatuka kombanda yefuta, ola wila momeva efuta novanhu 12 ova filamo.

**Ponhele Lakehurste** muAmerika, odila vali imwe yokutalatala, oya mbolokotela pedu noya lya ovanhu vatatu.

**Ovaneumbo** limwe vahetatu vomu Slade, Kentucky, ova fya oshihauto shavo sha fenunuka fimbo sha li momututu wondundu omo mwa enda oshitauba. Oshihauto she li ngwashula mondudu noshiponga sha holoka

**Mu San, Costa Ric** ounona vaano nakamwe va fudikwa nomwenyo eshi ekakamo ledu la ningwa nomau-mbo a nyonaunwa po kodula idju.

**Venezuela**—Ovanhu vatatu ova fya novayulishi 15 okwa diladilwa ova fila momeva, eshi ekakamo ledu le lelinskyengia moshilongo.

**Vryheid**—Omutilyane wedina William Burger okwa fya eshi okadila omo vali naxe ka wila pedu popepi na Vryheid. Omushamane xe okwa ehamekwa unene.

**Odila** imwe vali oya topela mombanda ponhele Mulhouse nomushingi ina xupa vali.

## YATATU YA VALWA

**Mariental.**— Omukulukadhi Kitty Steyn gwomofaalama Zonderloop okwa vala uunona utatu auhe uukadhona, wa kola nawa. Omusamane gwe Hedrik Steyn okwa nyanyukwa. Omukulukadhi oku noomvula 34.

# INO NYONA OHOMBO

## OREPUBLIKA YA HALA ELO-NGELOKUME NASWAZILAND

**MBABANE.**—Ehalo lepangelo la Suid-Afrika olo okutwikila ekwatafano lombili melongelokumwe liwa naSwaziland, eshi edu eli la manguluka paife, osho omushamane G.J.J.Steyn, hamushanga woilandifomwa muSuid-Afrika a popya.

Omushamane Steyn okwa hovelifa neendjovo edi oshivilo shomafiyafanepo a longekidilwa oshivilo shemanguluko muManzini.

Okwa popya kutya, okukala kwe-pangelo laSuid-Afrika moshivilo osho kaku fi ashike okudana oshivilo nokuyandja efimano koshiwana shOvaswazi, ndelene okuholola ehalo loRepublika okutwikila elongelokumwe noshiwana eshi sha mono oupe.

Elongelokumwe eli ola kala po nale.


## UUMWAYINATHANA

*Eslen Peter Ambambi ota nyola ngeyi;* Uumwayinathana owa eta kuKristus mwene sho a si komushigakano hoka twa etelwa ohole, ombili nuukuume mekwatathano naantu yi ili noyi ili mokati ketu nenge pondje yevi noyoshigwana she-tu Aawambo.

Omuyapostoli Paulus otati: Gwanitheni uuwanawa auhe. Natango aamwameme mbyoka yoshili naambymyoka yo opala naambyoka yuuka naambyoka ya yeleka noyi na epo-pilo ewanawa, ongele omikalo nenge esimaneko, oombika ayihe yi dhiladhileni koomwenyo dheni.

Ishewe naambika mwe yi ilongo nomweyi longwa nomwe yi uvu kungame, yi gwanitheni. Kalunga kombili nota kala pamwe nane. Kalunga kombili oye na kale omuyakuli gwopokati kokukalamwenyo kwetweni. *N. Metunda naJ. Shaamena Okau-kwyeo, Etosha,* ota nyola ngaha. Efiku limwe onda ka talele po mu-kwetu Lucas Dumeni oku ha longo. Otwa kundafana nombili fiyo handi shuna. Konima yokafimbo ondi wete mukwetu a endjeleleka eenyala ta ti okwa mona oshiponga. Mboli eenyala daye adishe mbali da tetwa ko kokashina kokukashula omwiidi. Pai-fe oku li ngo xwepo.

Tu indilileni fye ava hatu longo mehalakano mOushimba, osheshi o-hatu monenemo oixuna noiponga inene.



L. Nanghaku, Posbus 29, Kombat

Ovakriste vakwetu otwa dimbulukweni tuu oshipango eshi oshititano nashimwe osho tashi tu keelele tuha nyone ohombo? Omulumenhu nomukainhu keshe umwe ponhele yoye oshipango eshi otashi ku lombwele: "Ino nyona ohombo."

Apa onda hala tu taleni kombinaga yetu fye ovalumenhu. Unene tu taleni ovanangeshefa vamwe naavo hatu i kouxwi komaonda. Ovanangeshefa vahapu ova dimbwa oshipango eshi nova tala pamwe osha tutuka kashi navalii eenghono, ndele oshi na omwenyo efimbo keshe notashi ku londwele u ha nyone ohombo. Eshi ongeshefa yoye itai xumu komesho, omolwashike mbela? Oshike sha teya ondingosho yoye? Kape na malimbilido, oipala ashike.

Waima, haiti, ondingosho yoye ile ongeshefa otai i komesho ngahelipi ngenge owa tula mo ohonda onga ou te ku longele? Omunhu oo ohahamilamilema ngo we likongela. Ohai ku dimbulukifa kutya, ohonda oyo wa tula mo otai ku shotek ashike, tai ku xuu, osheshi oi shi shi kutya, oyo nakuya. Kaume mongeshefa yoye tula mo mumwanyoko ile nekulu loye ile omunhu umwe elili ehe shi ohonda.

Twa tonga kombinga imwe, tu taleni yo kombinga yovanamaonda. Ava mbela otava nyono ohombo ngahelipi? Waima, haiti, ku shii kutya, momaonda omwa kala olukanda. Onhele oyo ihai mono omushingi (ndalaiva), oofolomana, ovanambewa, ohai kokwa movapolifi, oo-

nduna, ookuki ihava tongwa nee ovo oupyakadi. Ovakwita vanekanda, oikongi yongombe yahaivinga, otwe ya okukongela omaumbo etu nedu letu eliko. Nde inatu ya momaonda okukongela omaumbo etu eshunduko nomikifi.

Taleni ohatu nyonopo eehombo daava ve li omu ndele hatu linyonene yo detu fye vene kOwambo. Elinekelafano pokati komuhomboli nomuhombolwa womukwaushimba tali teka molwoinima oyo.

Ombibeli koulunde ngaau otai ti: "Okeshe tuu omunhu ta tale omukainhu e mu xula oye kwe mu haela komweny& waye". Mat.5:27, 28. "Kamu shi shi omalutu eni oo oinhimbu yaKristus? Hano ndi kufe ko oinhimbu yaKristus ame ndi i ninge oinhimbu yohonda? Shidalelw. Ou ta kumu ohonda oye ota ningi ombelela imwe nayo". 1Kor.5:15-16. Onghee hano vakwetu nye, omuhaeli keshe mokuhaela kwaye ota nyono po olutu laye mwene. Tu djeni moulunde woludi keshe yoo.

L. Nanghaku

## OMUKWETU

Oshifo shOngerki onkwaevangeli paLuther yomOwambokavango

Die Tydskrif van die Evangeliese Lutherse Ovambokavangokerk  
Oha zi mOnipa.

Omukuluntu gwoshifo/ Hoof-redakteur omumbisofi

Dr. Leonard Auala,

Amushanga / redakteur

Ondando komumvo mOwambo 70c  
kUushimba nOkavango 90c

Kombanda yomafuta R1.30c.

Oondando nomambestelo naga tumwe kOmukwetu,

Onipa, Pk. Ondangwa, S. W. A.

Oshinyolwa shuule

wondeimi	1	otashi	futilwa	R1.00
oondeimi	2	"	"	R1.90
oondeimi	3	"	"	R2.70
oondeimi	4	"	"	R3.40
oondeimi	5	"	"	R5.00

Oto vulu okutuma efano lyaashoka wa hala shi tseyithwe nomatumbulo wo gasha ngele ope na.